

Ambasador Bond na oproštajnom sastanku sa Špirićem



Ambasador Clifford Bond, izaslanik visokog predstavnika za Srebrenicu, danas je bio u oproštajnoj posjeti predsjedavajućem Vijeća ministara BiH Nikoli Špiriću.

Ambasador je naglasio da ekonomski razvoj predstavlja najbolji način da se osigura budućnost Srebrenice.

Ambasador je zahvalio Vijeću ministara BiH na podršci Srebrenici u prethodnom periodu. Ukazao je na to da, kako Općina već efikasno troši sredstva koja su ranije dodijeljena, Vijeće ministara razmotri dodatna ulaganja.

“Ulaganja privatnih lica i otvaranje radnih mjesta su takođe ključni za ekonomski oporavak Srebrenice i održivost povratka”, rekao je. I međunarodni donatori moraju nastaviti da koordiniraju svoje aktivnosti u pomoći, a rješavanjem ključnih prioriteta lokalne zajednice moraju osigurati da efekat njihovih programa bude vidljiv.

“Budućnost Srebrenice ovisi i o provođenju pravde. Neuspjeh u hapšenju Radovana Karadžića i Ratka Mladića te kasno otpočinjanje istraga protiv osoba na takozvanoj ‘Srebreničkoj listi’ će nastaviti da ugrožava napore na pomirenju u BiH, a posebno u području Srebrenice”, rekao je ambasador. “Zbog toga BiH treba efikasnu Državnu strategiju rješavanja slučajeva ratnih zločina koja utvrđuje jasne standarde i prioritete u istraživanju i krivičnom gonjenju svih ratnih zločina.”

Ambasador Bond je zahvalio Vijeću ministara BiH na efikasnoj suradnji tokom njegovog mandata u svojstvu izaslanika visokog predstavnika za Srebrenicu.